

Datganiad Llywodraeth Cymru am Barth Rheoli Dros Dro (Ffliw Adar) – **ger Amlwch, Ynys Môn**

- 1) Mae Gweinidogion Cymru wedi ystyried canfyddiadau ymchwiliadau milfeddygol mewn safle lle amheuir fflw adar, yn unol ag erthygl 13(c) o Orchymyn Fflw Adar a Fflw sy'n Deillio o Adar mewn Mamaliaid (Cymru) (Rhif 2) 2006¹ ("y Gorchymyn").
- 2) Mae Prif Swyddog Milfeddygol Cymru wedi cadarnhau presenoldeb fflw adar H5N8 yng Nghymru.
- 3) Er mwyn lleihau'r risg o drosglwyddo fflw adar, mae Gweinidogion Cymru drwy hyn yn datgan Parth Rheoli Dros Dro yn yr ardaloedd o amgylch y safle a ddisgrifir yn Atodiad 1 (Parth A) ac yn Atodiad 2 (Parth B) i'r Datganiad hwn lle mae'r mesurau priodol a nodir yn Atodlenni 4 a 5 i'r Gorchymyn (fel y'u hatgynhyrchir yn Atodiadau 1 a 2) yn gymwys.
- 4) Mae ardaloedd A a B y Parth Rheoli Dros Dro wedi'u marcio ar y map yn Atodiad 3.
- 5) Mae'r mesurau hyn yn gymwys o **21:00 ar 27 Ionawr 2021** hyd nes y bydd y Datganiad hwn yn cael ei dynnu'n ôl neu ei ddiwygio gan ddatganiad pellach.

Llofnodwyd: Christianne Glossop, Prif Swyddog Milfeddygol Cymru

Dyddiad: 27 Ionawr 2021

O dan awdurdod Gweinidog yr Amgylchedd, Ynni a Materion Gwledig, un o Weinidogion Cymru.

Gallu methu â chydymffurfio â'r Datganiad hwn fod yn drosedd o dan adran 72 neu 73 o Ddeddf Iechyd Anifeiliaid 1981.

Mae Atodlenni i'r Gorchymyn wedi'u hatodi er mwyn gallu cyfeirio atynt yn hawdd. Mae copiâu o'r Datganiad hwn a'r Gorchymyn ar gael ar [dudalennau gwe](#) Llywodraeth Cymru a chan Llywodraeth Cymru, Parc Cathays, Caerdydd CF10 3NQ.

¹ O.S. 2006/2927 (Cy. 262)

Atodiad 1

Ardal A y Parth Rheoli Dros Dro

Mae Ardal A y Parth Rheoli Dros Dro (TCZ-A) yn cynnwys y rhan honno o Ynys Môn sydd o fewn y cylch glas llai â'i ganolbwynt ar gyfeirnod grid SH4708690285 ar y map yn Atodiad 3

Y Mesurau o'r Gorchymyn sy'n gymwys yn Ardal A y Parth Rheoli Dros Dro

Cofnod o ymwelwyr

1) Yn ddarostyngedig i baragraff 5, rhaid i feddiannydd unrhyw safle yn y parth lle cedwir dofednod neu adar caeth eraill gadw cofnodion o—

a) enw a chyfeiriad unrhyw berson sy'n ymweld â'r safle (oni bai bod yr ymweliad â rhan o'r safle lle mae pobl yn byw yn unig a lle na chedwir unrhyw ddofednod neu adar caeth eraill);

b) dyddiad yr ymweliad;

c) a gafodd y person unrhyw gysylltiad â dofednod neu adar caeth eraill ar y safle.

Cofnod o ddofednod

2) Rhaid i feddiannydd unrhyw safle yn y parth wneud cofnod o'r holl ddofednod sy'n cyrraedd neu'n gadael y safle hwnnw cyn gynted ag sy'n rhesymol ymarferol ar ôl y symud.

Cofnod o symudiadau dofednod ac wyau

3) Yn ddarostyngedig i baragraff 5, rhaid i unrhyw berson sy'n ymwneud â chludo neu farchnata dofednod neu wyau dofednod yn y parth wneud cofnod, cyn gynted ag sy'n rhesymol ymarferol, o'r holl ddofednod ac wyau dofednod y mae wedi'u cludo neu eu marchnata.

Symudiadau dofednod i'w cofnodi

4) Rhaid i'r cofnodion y cyfeirir atynt ym mharagraffau 2 a 3 uchod gynnwys—

a) y swm a disgrifiad (yn cynnwys rhywogaethau'r dofednod neu'r math o wy) a gludwyd neu a farchnatwyd;

b) yn achos symudiad o safle yn y parth—

(i) dyddiad y symudiad o'r safle;

(ii) safle'r gyrchfan (os yw'n hysbys);

(iii) enw a chyfeiriad y person y mae perchnogaeth yn cael ei throsglwyddo neu wedi'i throsglwyddo iddo neu y mae meddiant yn cael ei drosglwyddo neu wedi'i drosglwyddo iddo;

c) yn achos symud i safle yn y parth—

(i) dyddiad y symud;

(ii) y safle y symudwyd ohono (os yw'n hysbys);

(iii) enw a chyfeiriad y person y mae perchnogaeth yn cael ei throsglwyddo neu wedi'i throsglwyddo iddo neu y mae meddiant yn cael ei drosglwyddo neu wedi'i drosglwyddo iddo;

(d) yn achos marchnata heb symudiad cysylltiedig, enw a chyfeiriad y person y trosglwyddwyd perchnogaeth iddo a'r dyddiad trosglwyddo;

Cwmpas dyletswyddau cadw cofnodion

5) Nid yw paragraffau 1 a 3 yn gymwys i'r canlynol —

a) symud wyau'n uniongyrchol i safle manwerthu, ar neu o safle o'r fath neu'n dilyn symudiad o'r fath;

b) symudiad pobl i swau, parciau bywyd gwyllt neu (oni bai ei fod yn ofynnol gan Weinidogion Cymru) unrhyw safle arall sy'n agored i'r cyhoedd, cyn belled nad oes gan y cyhoedd fynediad i unrhyw ardal lle mae adar yn cael eu cadw;

(c) symudiad y canlynol i unrhyw safle lle mae dofednod neu adar caeth eraill yn cael eu cadw—

(i) unrhyw berson ar hawl dramwy gyhoeddus neu sy'n defnyddio hawl dramwy i gael mynediad i'r safle;

(ii) tresmaswyr;

(iii) unrhyw berson sy'n gweithredu'r Gorchymyn hwn.

Ynysu dofednod ac adar caeth eraill

6) Rhaid i feddiannydd safle yn y parth lle cedwir dofednod neu adar caeth eraill sicrhau eu bod—

(a) yn cael eu cadw dan do; neu

(b) wedi eu hynysu (os yw arolygydd milfeddygol yn gorchymyn hynny ar y sail nad yw eu cadw dan do yn ymarferol neu y byddai hynny'n cael effaith andwyol ar les yr adar i raddau sylweddol).

Mesurau lle nad yw adar yn cael eu cadw dan do

7) Os yw adar yn cael eu hynysu ond nid eu cadw dan do, rhaid i'r meddiannydd—

(a) sicrhau nad ydynt yn dod i gysylltiad â dofednod neu adar caeth eraill ar safle arall; a

(b) cymryd pob cam rhesymol i leihau eu cysylltiad ag adar gwyllt, yn unol â chyfarwyddiadau arolygydd milfeddygol.

Cyfyngiadau ar symud dofednod, adar caeth eraill a mamaliaid i safle ac oddi yno

8) (1) Yn ddarostyngedig i is-baragraff (2), ni chaiff unrhyw berson symud dofednod, adar caeth eraill na mamaliaid i neu o safle yn y parth lle cedwir dofednod neu adar caeth eraill, oni bai bod y symudiad wedi'i drwyddedu gan arolygydd milfeddygol neu gan arolygydd o dan gyfarwyddyd arolygydd milfeddygol.

(2) Nid yw is-baragraff (1) yn gymwys i anifeiliaid anwes—

(a) nad ydynt ond yn cael mynediad i'r rhan o'r safle lle mae pobl

yn byw;

(b) nad ydynt yn dod i gysylltiad â dofednod neu adar caeth eraill ar y safle; ac

(c) nad oes ganddynt fynediad i unrhyw gewyll neu ardaloedd ar y safle lle cedwir dofednod neu adar caeth eraill.

Gwaredu carcasau

9) Rhaid i'r meddiannydd sicrhau bod pob carcas nad yw wedi'i atafaelu neu ei waredu gan arolygydd milfeddygol yn cael ei waredu yn unol â chyfarwyddiadau arolygydd milfeddygol (oni bai ei fod yn rhoi trwydded i'w ddefnyddio ar gyfer gwneud diagnosis o glefyd).

Mesurau bioddiogelwch

10) Rhaid i'r meddiannydd ac unrhyw berson sy'n cyrraedd neu'n gadael y safle yn y parth lle cedwir dofednod, adar caeth eraill neu wyau—

(a) gymryd y mesurau bioddiogelwch y mae'n ystyried sydd eu hangen i leihau'r risg o ledaenu ffliw adar i'r safle neu oddi yno; a

(b) cydymffurfio ag unrhyw ofynion bioddiogelwch y mae arolygydd milfeddygol neu arolygydd o dan gyfarwyddyd arolygydd milfeddygol, drwy hysbysiad iddo, yn eu gosod.

Sarn, tail dofednod a slyri

11) Ni chaiff unrhyw berson symud o safle yn y parth na gwasgaru sarn dofednod a ddefnyddiwyd, tail dofednod na slyri dofednod oni bai bod arolygydd milfeddygol neu arolygydd o dan gyfarwyddyd arolygydd milfeddygol wedi trwyddedu hynny.

Crynoadau o ddofednod

12) Ni chaiff unrhyw berson ganiatáu i ddofednod neu unrhyw adar caeth eraill gael eu casglu mewn unrhyw ffair, marchnad, sioe, arddangosfa neu unrhyw grynhoed arall yn y parth.

Rhyddhau adar hela

13) Ni chaiff unrhyw berson ryddhau adar hela yn y parth.

Cyfyngiadau ar symud dofednod, wyau, cig dofednod a charcasau

14) Ni chaiff unrhyw berson symud unrhyw ddofednod, wyau, cig dofednod na charcasau yn y parth neu'r tu allan i'r parth oni bai bod y symudiad—

(a) wedi'i nodi ym mharagraff 16 a'i fod-

(i) yn uniongyrchol; a

(ii) wedi'i drwyddedu gan arolygydd milfeddygol neu gan arolygydd o dan gyfarwyddyd arolygydd milfeddygol;

(b) yn wyau bwyta sy'n cael eu symud yn uniongyrchol i safle cyfanwerthu neu fanwerthu, neu'n dilyn symudiad o'r fath; neu

(c) o fewn yr un safle.

Cludiant ar y ffordd a'r rheilffordd

15) Gellir cludo dofednod ac wyau drwy'r parth ar briffordd neu reilffordd os nad oes rhaid aros ar y ffordd o fewn y parth.

Symudiadau y gall arolygydd milfeddygol neu arolygydd o dan ei gyfarwyddyd eu trwyddedu

16) Y symudiadau y cyfeirir atynt ym mharagraff 14(a) yw symudiadau—

(a) dofednod o safle yn y parth i'w lladd yn syth mewn lladd-dy dynodedig (os bodlonir gofynion paragraff 17);

(b) cig dofednod (os bodlonir gofynion paragraff 18);

(c) dofednod i ladd-dy dynodedig yn y parth o safle y tu allan i'r parth (os bodlonir gofynion paragraff 19);

(d) cywion diwrnod oed sydd wedi deor o wyau a gynhyrchwyd yn y parth neu o wyau a ddaeth i gysylltiad ag wyau o'r fath (os bodlonir gofynion paragraff 20);

(e) cywion diwrnod oed sydd wedi deor o wyau sy'n deillio o'r tu allan i'r TCZ-A ac a gadwyd ar wahân i wyau a gynhyrchwyd mewn parth o'r fath (os bodlonir gofynion paragraff 21);

(f) dofednod sy'n barod i ddodwy i safle neu ran o safle lle nad oes dofednod yn cael eu cadw (os bodlonir gofynion paragraff 22);

(g) wyau sy'n deor o'r tu allan i'r parth i ddeorfa ddynodedig yn y parth neu i safle dynodedig i'w defnyddio at ddibenion gwyddonol, diagnostig neu fferyllol;

(h) wyau sy'n deor o'r parth—

(i) i ddeorfa ddynodedig; neu

(ii) i safle dynodedig i'w defnyddio at ddibenion gwyddonol, diagnostig neu fferyllol (os bodlonir gofynion paragraff 23 yn y ddau achos);

- (i) wyau i ganolfan pacio wyau ddynodedig (os bodlonir gofynion paragraff 24);
- (j) wyau i waith prosesu wyau;
- (k) wyau ar gyfer eu gwaredu;
- (l) carcasau ar gyfer eu gwaredu neu wneud diagnosis.

Gofynion i symud dofednod o safle yn y parth i ladd-dy dynodedig

17) Ni ddylid symud dofednod i ladd-dy dynodedig oni bai bod y gofynion canlynol yn cael eu bodloni—

- (a) bod arolygydd milfeddygol wedi archwilio'r dofednod yn y safle llai na 24 awr cyn iddynt adael y safle; a
- (b) bod y dofednod yn cael eu cludo mewn cerbydau wedi'u selio gan arolygydd milfeddygol neu yn unol â'i gyfarwyddiadau.

Gofynion i symud cig dofednod o ddofednod a anfonwyd i ladd-dy dynodedig o safle yn y parth

18) Ni ddylid symud cig dofednod o ddofednod yn y parth o ladd-dy dynodedig oni bai ei fod yn bodloni gofynion erthygl 63(2) o'r Gorchymyn.

Gofynion i symud dofednod i ladd-dy dynodedig o fewn y parth i safle y tu allan i'r parth

19) Ni ddylid symud dofednod o safle y tu allan i'r parth i ladd-dy dynodedig yn y parth oni bai bod y dofednod yn cael eu cadw ar wahân i ddofednod sy'n deillio o'r parth.

Gofynion i symud cywion diwrnod oed sydd wedi deor o wyau a gynhyrchwyd yn y parth neu o wyau a ddaeth i gysylltiad ag wyau o'r fath

20) Ni ddylid symud cywion diwrnod oed o wyau a gynhyrchwyd yn y parth neu o wyau sydd wedi dod i gysylltiad ag wyau o'r fath oni bai eu bod yn cael eu cludo mewn cerbydau wedi'u selio gan arolygydd milfeddygol neu yn unol â'i gyfarwyddiadau.

Gofynion i symud cywion diwrnod oed sydd wedi deor o wyau sy'n deillio o'r tu allan i'r parth

21) Ni ddylid symud cywion diwrnod oed sy'n deillio o'r tu allan i'r TCZ-A oni bai bod y ddeorfa yn TCZ-A yn cael ei gweithredu mewn ffordd sy'n golygu na ddaw'r wyau hynny i gysylltiad ag wyau neu gywion diwrnod oed o fewn y parth.

Gofynion i symud dofednod sy'n barod i ddodwy

22) Ni ddylid symud dofednod sy'n barod i ddodwy o'r safle yn y parth oni bai—

- (a) bod dofednod ac adar caeth eraill ar y safle wedi'u harchwilio gan arolygydd milfeddygol; a
- (b) bod y dofednod sy'n barod i ddodwy yn cael eu cludo mewn cerbydau sydd wedi'u selio gan yr arolygydd milfeddygol neu yn unol â'i gyfarwyddiadau.

Gofynion i symud wyau sy'n deor o'r parth i ddeorfa ddynodedig neu i safle dynodedig i'w defnyddio at ddibenion gwyddonol, diagnostig neu fferyllol

23) Ni ddylid symud wyau sy'n deor o'r parth i ddeorfa ddynodedig, neu i safle dynodedig i'w defnyddio at ddibenion gwyddonol, diagnostig neu fferyllol oni bai—

- (a) bod arolygydd milfeddygol wedi cadarnhau nad yw'n amau ffliw adar yn yr heidiau y mae'r wyau'n deillio ohonynt;
- (b) bod yr wyau a'u deunydd pacio wedi'u diheintio cyn eu danfon; ac
- (c) bod yr wyau'n cael eu cludo mewn cerbydau wedi'u selio gan arolygydd milfeddygol neu yn unol â'i gyfarwyddiadau.

Gofynion i symud wyau i ganolfan pacio wyau

24) Ni ddylid symud wyau i ganolfan pacio wyau ddynodedig oni bai—

- (a) eu bod wedi'u pacio mewn deunydd pacio y gellir ei daflu; a #
- (b) bod unrhyw berson sy'n cludo'r wyau'n cydymffurfio ag unrhyw ofynion bioddiogelwch a bennwyd gan arolygydd milfeddygol, drwy hysbysiad neu drwy amod trwydded.

Gofynion mewn lladd-dai

25) Rhaid i feddiannydd y lladd-dy yr anfonir y dofednod o'r parth iddo sicrhau bod gofynion erthygl 63 y Gorchymyn yn cael eu bodloni.

Gofynion ar gyfer cig dofednod o'r parth

26) Mae cig dofednod yn y parth o ddofednod sy'n deillio o'r parth yn ddarostyngedig i ofynion a nodir yn erthyglau 63(3) a 63(4) o'r Gorchymyn.

Gofynion ar gyfer cig dofednod o'r tu allan i'r parth

27) Mae cig dofednod yn y parth o ddofednod sy'n deillio o'r tu allan i'r parth yn ddarostyngedig i'r gofynion a nodir yn erthygl 63(3)(a) o'r Gorchymyn.

Glanhau a diheintio cerbydau sy'n cludo unrhyw beth a allai fod wedi'i halogi

28) Rhaid i berson sy'n symud unrhyw ddofednod, aderyn caeth arall, cig, bwyd anifeiliaid, tail, slyri, sarn neu unrhyw beth arall a allai fod wedi'i halogi, lanhau a diheintio'r cerbyd ac unrhyw gyfarpar a ddefnyddir i gludo'r peth hwnnw cyn gynted ag y bydd wedi'i ddadlwytho, yn unol ag erthygl 66 o'r Gorchymyn.

Glanhau a diheintio cerbydau

29) Rhaid i berson sy'n cyrraedd neu'n gadael safle yn y parth mewn cerbyd lanhau a diheintio unrhyw ran o'r cerbyd a allai fod wedi'i halogi yn ddi-oed, yn unol ag erthygl 66 o'r Gorchymyn.

Mynediad i leoedd gwaharddedig

30) Ni chaiff unrhyw berson fynd i mewn i unrhyw le sy'n ddarostyngedig i hysbysiad cyfyngu o dan erthygl 79 o'r Gorchymyn ac eithrio yn unol â'r hysbysiad hwnnw neu ag erthygl 35 o'r Gorchymyn.

Atodiad 2 - Ardal B y Parth Rheoli Dros Dro

Mae Ardal B y Parth Rheoli Dros Dro (TCZ-B) yn cynnwys yr ardal honno o Ynys Môn ar y map ynghlwm y tu hwnt i'r cylch glas (Ardal A y Parth Rheoli Dros Dro) ac o fewn cylch du radiws 10 cilometr, â'i ganolbwynt ar gyfeirnod grid SH4708690285 ac fel y dangosir ar y map yn Atodiad 3.

Mesurau yn Ardal B y Parth Rheoli Dros Dro**Cofnod o ymwelwyr**

- 1) Yn ddarostyngedig i baragraff 5, rhaid i feddiannydd unrhyw safle lle cedwir dofednod neu adar caeth eraill gadw cofnodion o—
 - (a) enw a chyfeiriad unrhyw berson sy'n ymweld â'r safle (oni bai bod yr ymweliad â rhan o'r safle lle mae pobl yn byw yn unig a lle na chedwir unrhyw ddofednod neu adar caeth eraill);
 - (b) dyddiad yr ymweliad;
 - (c) a gafodd y person unrhyw gysylltiad â dofednod neu adar caeth eraill ar y safle.

Cofnod o ddofednod

2) Rhaid i feddiannydd unrhyw safle yn y parth wneud cofnod o'r holl ddofednod sy'n cyrraedd neu'n gadael y safle hwnnw cyn gynted ag sy'n rhesymol ymarferol ar ôl y symud.

Cofnod o symudiadau dofednod

3) Yn ddarostyngedig i baragraff 5, rhaid i unrhyw berson sy'n ymwneud â chludo neu farchnata dofednod neu wyau dofednod yn y parth wneud cofnod cyn gynted ag sy'n rhesymol ymarferol o'r holl ddofednod ac wyau dofednod y mae wedi'u cludo neu eu marchnata.

Symudiadau dofednod i'w cofnodi

- 4) Rhaid i'r cofnodion y cyfeirir atynt ym mharagraffau 2 a 3 uchod gynnwys—
 - (a) swm a disgrifiad (yn cynnwys rhywogaethau'r dofednod a'r math o wyau) a gludwyd neu a farchnatwyd;
 - (b) yn achos symud o safle yn y parth—
 - (i) dyddiad y symudiad o'r safle;
 - (ii) safle'r gyrchfan (os yw'n hysbys);

(iii) enw a chyfeiriad y person y mae perchnogaeth yn cael ei throsglwyddo neu wedi'i throsglwyddo iddo neu y mae meddiant yn cael ei drosglwyddo neu wedi'i drosglwyddo iddo;

(c) yn achos symudiad i safle yn y parth—

(i) dyddiad y symud;

(ii) y safle y symudwyd ohono (os yw'n hysbys);

(iii) enw a chyfeiriad y person y mae perchnogaeth yn cael ei throsglwyddo neu wedi'i throsglwyddo iddo neu y mae meddiant yn cael ei drosglwyddo neu wedi'i drosglwyddo iddo;

(d) yn achos marchnata heb symudiad cysylltiedig, enw a chyfeiriad y person y trosglwyddwyd perchnogaeth iddo a dyddiad y trosglwyddo.

Cwmpas dyletswyddau cadw cofnodion

5) Nid yw paragraffau 1 a 3 yn gymwys i'r canlynol—

(a) symud wyau'n uniongyrchol i safle manwerthu, ar neu o safle o'r fath neu'n dilyn symudiad o'r fath;

(b) symudiad pobl i swau, parciau bywyd gwyllt neu (oni bai ei fod yn ofynnol gan Weinidogion Cymru) unrhyw safle arall sy'n agored i'r cyhoedd, cyn belled nad oes gan y cyhoedd fynediad i unrhyw ardal lle mae adar yn cael eu cadw;

(c) symudiad y canlynol i unrhyw safle lle mae dofednod neu adar caeth eraill yn cael eu cadw—

(i) unrhyw berson ar hawl dramwy gyhoeddus neu sy'n defnyddio hawl dramwy i gael mynediad i'r safle;

(ii) tresmaswyr;

(iii) unrhyw berson sy'n gweithredu'r Gorchymyn hwn.

Cyfyngiadau ar symud dofednod, adar caeth eraill a mamaliaid i safle ac oddi yno

6) (1) Yn ddarostyngedig i is-baragraff (2), ni chaiff unrhyw berson symud dofednod, adar caeth eraill na mamaliaid i neu o safle yn y parth lle cedwir dofednod neu adar caeth eraill, oni bai bod y symudiad wedi'i drwyddedu gan arolygydd milfeddygol neu gan arolygydd o dan gyfarwyddyd arolygydd milfeddygol.

(2) Nid yw is-baragraff (1) yn gymwys i anifeiliaid anwes—

(a) nad ydynt ond yn cael mynediad i'r rhan o'r safle lle mae pobl yn byw;

(b) nad ydynt yn dod i gysylltiad â dofednod neu adar caeth eraill ar y safle; ac

(c) nad oes ganddynt fynediad i unrhyw gewyll neu ardaloedd ar y safle lle cedwir dofednod neu adar caeth eraill.

Mesurau bioddiogelwch

7) Rhaid i'r meddiannydd ac unrhyw berson sy'n cyrraedd neu'n gadael y safle yn y parth lle cedwir dofednod, neu adar caeth eraill neu wyau—

- (a) gymryd y mesurau bioddiogelwch y mae'n ystyried sydd eu hangen i leihau'r risg o ledaenu fflw adar i'r safle neu oddi yno; a
- (b) cydymffurfio ag unrhyw ofynion bioddiogelwch y mae arolygydd milfeddygol neu arolygydd o dan gyfarwyddyd arolygydd milfeddygol, drwy hysbysiad iddo, yn eu gosod.

Sarn, tail dofednod a slyri

8) Ni chaiff unrhyw berson symud o safle yn y parth na gwasgaru sarn dofednod a ddefnyddiwyd, tail dofednod na slyri dofednod oni bai bod arolygydd milfeddygol neu arolygydd o dan gyfarwyddyd arolygydd milfeddygol wedi trwyddedu hynny.

Crynoadau o ddofednod

9) Ni chaiff unrhyw berson ganiatáu i ddofednod neu unrhyw adar caeth eraill gael eu casglu mewn unrhyw ffair, marchnad, sioe, arddangosfa neu unrhyw grynhoad arall yn y parth.

Rhyddhau adar hela

10) Ni chaiff unrhyw berson ryddhau adar hela yn y parth.

Cyfyngiadau ar symud dofednod ac wyau yn y parth

11) Yn ddarostyngedig i baragraff 12, ni chaiff unrhyw berson symud unrhyw ddofednod neu wyau o fewn y parth (ac eithrio drwy'r parth ar y ffordd neu'r rheilffordd heb aros), oni bai bod hynny wedi'i drwyddedu gan arolygydd milfeddygol.

Dosbarthu wyau i safleoedd cyfanwerthu neu fanwerthu yn y parth

12) Nid yw paragraff 11 yn berthnasol i symud wyau'n uniongyrchol i safleoedd cyfanwerthu neu fanwerthu, neu'n dilyn symudiad o'r fath.

Mesurau bioddiogelwch

13) Ni ddylai arolygydd milfeddygol roi trwydded o dan baragraff 11 oni bai ei fod yn fodlon y bydd y trwyddedai'n cymryd mesurau bioddiogelwch priodol ac mae'n rhaid i gymryd mesurau o'r fath fod yn amodau'r drwydded.

Symud dofednod i ladd-dy

14) Gall arolygydd milfeddygol roi trwydded i symud dofednod o'r tu allan i unrhyw TCZ-A a TCZ-B fflw adar i ladd-dy o fewn y TCZ-B a symudiadau dilynol y cig sy'n deillio o ddofednod o'r fath.

Cyfyngiadau ar symud dofednod ac wyau allan o'r parth

15) (1) Yn ddarostyngedig i baragraff 16, ni chaiff unrhyw berson symud unrhyw ddofednod neu wyau allan o'r parth, oni bai bod y symud yn—

- (a) symudiad a nodwyd yn is-baragraff (2); a
- (b) wedi'i drwyddedu gan arolygydd milfeddygol.
- (2) Mae'r symudiadau y cyfeirir atynt yn is-baragraff (1) yn symudiadau—
 - (a) dofednod i'w lladd (os bodlonir gofynion paragraff 17);
 - (b) cywion diwrnod oed sydd wedi deor o wyau a gynhyrchwyd yn y TCZ-A neu TCZ-B neu o wyau a ddaeth i gysylltiad ag wyau o'r fath (os bodlonir gofynion paragraff 18);
 - (c) cywion diwrnod oed sydd wedi deor o wyau sy'n deillio o'r tu allan i'r TCZ-A a TCZ-B ac a gadwyd ar wahân i wyau a gynhyrchwyd mewn parth o'r fath (os bodlonir gofynion paragraff 19);
 - (d) dofednod sy'n barod i ddodwy i safle neu ran o safle lle nad oes dofednod yn cael eu cadw;
 - (e) wyau sy'n deor o'r parth—
 - (i) i ddeorfa ddynodedig; neu
 - (ii) i safle dynodedig i'w defnyddio at ddibenion gwyddonol, diagnositg neu fferyllol (os bodlonir gofynion paragraff 20 yn y ddau achos);
 - (f) wyau i ganolfan pacio wyau ddynodedig (os bodlonir gofynion paragraff 21);
 - (g) wyau i waith prosesu wyau;
 - (h) wyau ar gyfer eu gwaredu.

Dosbarthu wyau bwyta i safleoedd cyfanwerthu a manwerthu

16) Nid yw paragraff 15 yn gymwys i symud wyau bwyta yn uniongyrchol i safleoedd cyfanwerthu neu fanwerthu, neu'n dilyn symudiad o'r fath.

Gofynion i symud dofednod o safle yn y parth i ladd-dy dynodedig

17) Gellir symud dofednod o safle yn y parth i ladd-dy dynodedig, ond dim ond o fewn 24 awr i gwblhau archwiliad milfeddygol o'r safle.

Gofynion i symud cywion diwrnod oed sydd wedi deor o wyau a gynhyrchwyd yn y TCZ-A neu TCZ-B neu o wyau a ddaeth i gysylltiad ag wyau o'r fath

18) Ni ddylid symud cywion diwrnod oed o wyau a gynhyrchwyd yn y TCZ-A neu TCZ-B neu o wyau sydd wedi dod i gysylltiad ag wyau o'r fath oni bai y cydymffurfir ag unrhyw fesurau bioddiogelwch a bennwyd gan arolygydd milfeddygol drwy hysbysiad neu amod trwydded.

Gofynion i symud cywion diwrnod oed sydd wedi deor o wyau sy'n deillio o'r tu allan i'r TCZ-A a TCZ-B

19) Ni ddylid symud cywion diwrnod oed sy'n deillio o'r tu allan i unrhyw TCZ-A a TCZ-B fflw adar oni bai bod y ddeorfa yn y parth yn cael ei gweithredu mewn ffordd

sy'n golygu na ddaw'r wyau hynny i gysylltiad ag wyau neu gywion diwrnod oed sy'n deillio o'r parth.

Gofynion i symud wyau sy'n deor o'r parth i ddeorfa ddynodedig neu i safle dynodedig i'w defnyddio at ddibenion gwyddonol, diagnostig neu fferyllol

20) Ni ddylid symud wyau sy'n deor o'r parth i ddeorfa ddynodedig neu i safle dynodedig i'w defnyddio at ddibenion gwyddonol, diagnostig neu fferyllol oni bod yr wyau a'u deunydd pacio wedi'u diheintio cyn iddynt adael y safle.

Gofynion i symud wyau i ganolfan pacio wyau

21) Ni ddylid symud wyau i ganolfan pacio wyau ddynodedig oni bai—

- (a) eu bod wedi'u pacio mewn deunydd pacio y gellir ei daflu; a
- (b) bod unrhyw berson sy'n cludo'r wyau'n cydymffurfio ag unrhyw fesurau bioddioogelwch a bennwyd gan arolygydd milfeddygol.

Glanhau a diheintio cerbydau sy'n cludo unrhyw beth a allai fod wedi'i halogi

22) Rhaid i unrhyw berson sy'n symud unrhyw ddofednod, aderyn caeth arall, cig, porthiant, tail, slyri, sarn neu unrhyw beth arall a allai fod wedi'i halogi, lanhau a diheintio'r cerbyd ac unrhyw gyfarpar a ddefnyddiwyd i gludo'r peth hwnnw cyn gynted ag y bydd wedi'i ddadlwytho, yn unol ag erthygl 66 o'r Gorchymyn.

Glanhau a diheintio cerbydau

23) Rhaid i berson sy'n cyrraedd neu'n gadael safle yn y parth mewn cerbyd lanhau a diheintio unrhyw ran o'r cerbyd a allai fod wedi'i halogi yn ddi-oed, yn unol ag erthygl 66 o'r Gorchymyn.

Atodiad 3 - Map yn dangos y Parth Rheoli Dros Dro

